
ВИЛОЯТИМИЗ ПИЛЛАКОРЛАРИ РЕЖАНИ ОРТИҒИ БИЛАН УДДАЛАШДИ!

Фарғона вилояти пиллакорлари томонидан бу йил 39168 қути ипак қурти парваришланди, 2240 тоннадан зиёд “кумуш тола” етиштирилиб, режа ортиғи билан бажарилди.

Таъкидлаш керакки, ўтган 2021 йилда вилоятда 6 млн. 222 минг туп тут қўчатлари экилиб, шунингдек, 150 гектарга яқин янги тутзорлар барпо этилганди. Жорий йилда “Яшил макон” умуммиллий лойиҳаси асосида бунга қўшимча равишда 7 млн. 267 минг туп тут қўчатлари ўтқазилиб, парваришланди. Бу эса ипак қурти учун етарли озуқа базаси яратилишига, пилла ҳосили мўл бўлишига замин яратди.

Бундан ташқари, вилоятнинг шаҳар ва туманларидаги 4923 та фермер хўжаликлари билан 8 та пиллачилик кластерлари ўртасида пилла етиштириш бўйича шартномалар ҳамда фермер хўжаликлари билан 32778 нафар қурт боқувчилар ўртасида ички меҳнат шартномалари тузилди.

– Кейинги йилларда пиллачилик тармоғи жадал ривожланиб бормоқда. Бунда экспорт имкониятлари йилдан йилга яхшиланиб бораётгани, меҳнат қонунчилигида алоҳида имтиёзлар жорий этилаётгани, ипак қурти боқиш аҳолининг доимий даромад манбаига айланиб бораётгани аҳамиятли, – дейди вилоят “Агропилла” МЧЖ бошқаруви раиси Мақсуджон Қосимов. – Аввало, пиллачилик кластерлари билан ҳамкорликда ҳар йили минглаб иш ўрни яратилмоқда. Ҳар бир килограмм пилла ҳосили учун бу йил 24700 сўмдан тарози устида нақд пул тўлаб берилди. Шунингдек, 5 минг сўмдан давлат субсидия маблағи ҳам тўланяпти.

Бешариқ, Ёзёвон, Риштон тумани пиллакорлари биринчилардан бўлиб маррага етиб келдилар. Ўртача ҳосилдорлик 57,5 кг ни ташкил этмоқда.

“Кумуш тола” хирмони юксалишида вилоятда ташкил этилган 6 та кластер корхоналари, жумладан, “Нурли тонг силк” МЧЖ, “Beshariq ipagi” МЧЖ, “Dangara ipagi” МЧЖ, “Silk world business” МЧЖ, “Водил ипак йигирув” ШК, “Uchkoprik ipagi” МЧЖ корхоналарининг ҳиссаси катта бўлди.

Айтиш жоиз, вилоятда ишсиз ёшларни доимий иш ўрни билан таъминлаш, оилалар учун қўшимча даромад манбаи яратишда пиллачилик муҳим ўрин тутди. Йил мобайнида 2-3 марта ипак қурти боқиш натижасида йиллик меҳнат стажига эга бўлиш мумкинлиги йил сайин пиллакорлар сафи кенгайишини таъминламоқда.

Бизни ижтимоий тармоқларда кузатинг [Facebook](#), [Telegram](#), [Facebook](#), [YouTube](#), [Instagram](#)

2022-06-06 18:57:49